

Paras air mampu bertahan seminggu

BUKIT MERAH - Jabatan Pengairan dan Saliran (JPS) Kerian menjangkakan paras air Kolam Takungan Bukit Merah hanya mampu bertahan selama seminggu jika keadaan cuaca panas berterusan tanpa hujan.

Juruteranya, Ir Hasmi Mat berkata, paras air kolam terbabit kini dikategorikan sebagai Paras Kritikal Tahap 1, di mana kadar kealaman air semasa adalah 22.4 kaki padu.

Menurutnya, sekiranya paras air kolam jatuh pada tahap 20 kaki padu ke bawah, JPS terpaksa memutuskan untuk menghentikan bekalan pengairan padi bagi aktiviti pertanian berikutan mencapai tahap bahaya.

"Kami menjangkakan sekiranya keadaan panas berlarutan tanpa hujan dalam tempoh seminggu, bekalan air terdapat di kolam Bukit Merah ketika ini hanya mampu bertahan da-

lam tempoh seminggu untuk keperluan seharian penduduk daerah ini," katanya.

Hasmi berkata, JPS Kerian sudah melaksanakan catuan air bagi aktiviti pertanian pada 25 Februari lalu.

"Namun, kami tidak menolak kemungkinan bekalan pengairan bagi tujuan pertanian di daerah ini akan dihentikan serta-merta sekiranya keadaan cuaca berterusan panas tanpa hujan dan hanya membekalkan sumber bekalan air kepada Lembaga Air Perak (LAP)," katanya.

Katanya, senario bekalan air meruncing ini menyebabkan pihaknya melalui Kawasan Pembangunan Pertanian Bersepadu (IADA) Kerian memohon Jabatan Meteorologi Malaysia melaksanakan pembenihan awan dengan kadar segera.



Keadaan air kolam Bukit Merah yang semakin surut dan membimbangkan.